

NEWSPAPER CLIPPING



Date	: 22.11.2018
Title	: SSM sediakan geran RM10j bantu usahawan muda
Publication	: Utusan Malaysia
Page	: 7

SSM sediakan geran RM10j bantu usahawan muda

ROMPIN 21 Nov. – Suruhanjaya Syarikat Malaysia (SSM) memperuntukkan sebanyak RM10 juta berbentuk geran bagi membantu usahawan terutama dalam kalangan belia untuk memulakan perniagaan.

Pengarah Bahagian Strategi dan Komunikasi Korporat SSM, Mohamad Shahren Mohamad Yusri berkata, setakat ini, sebanyak 1,229 usahawan dari lima negeri iaitu Melaka, Perak, Pahang, Sabah dan Sarawak memperoleh manfaat daripada program Bizgrant berkenaan.

“Setiap usahawan menerima barangan untuk kegunaan perniagaan bernilai RM3,000 dan kini geran berkenaan masih baki RM6.3 juta.

“SSM akan meneruskan jelajah bagi memberi pendedahan dan membantu mengembangkan usahawan baharu di negeri-negeri lain pada tahun depan. SSM akan berada di Kedah pada 1 Disember ini bagi mencari usahawan seterusnya,” katanya kepada pemberita selepas majlis penutup program Desapreneurs@Uniten di Universiti Tenaga Nasional (Uniten) Kampus Sultan Haji Ahmad Shah (KSHAS) di Muadzam Shah di sini hari ini.

Yang hadir sama Timbalan Naib Canselor Uniten KSHAS, Prof. Dr. Salina Daud dan Ketua Seksyen Operasi SSM negeri, Zaidah Mohamed Zainun.



MOHAMAD SHAHREN MOHAMAD YUSRI (tengah) bersama usahawan Desapreneurs pada Majlis Penutupan Program Desapreneurs@Uniten Kolej Sultan Haji Ahmad Shah (KSHAS) dan Penyampaian Bizgrant SSM di Kampus KSHAS, Muadzam Shah, Rompin, Pahang, semalam. Turut hadir, Dr. Salina Daud (tujuh dari kanan). - UTUSAN/AHMAD ZAKKI JILAN

Seramai 200 usahawan sekitar Muadzam Shah menyertai kursus jangka pendek Desapreneurs@Uniten KSHAS sejak 17 Oktober lalu dan hari ini 76 orang daripada mereka menerima geran masing-masing.

Kursus jangka pendek tersebut diadakan bagi memberi pendedahan kepada usahawan kecil mengenai pengurusan perniagaan terkini agar dapat bersaing di pasaran terbuka.

Menurut Mohamad Shahren,

usahawan yang menerima geran sentiasa dipantau dalam usaha mengembangkan perniagaan mereka seperti dihasratkan.

“Bantuan tambahan juga akan diberikan kemudian sekiranya penerima benar-benar menjalankan perniagaan dan berjaya,” katanya.

Sementara itu, seorang penerima yang juga mahasiswa Uniten, **Shakir Luqman Sapawi**, 21, berkata, dia yang menjalankan perniagaan nasi goreng di

institusi pengajian tinggi sekitar Muadzam Shah dan Gambang dekat sini menerima sebuah peti sejuk beku.

“Dengan adanya peti sejuk beku itu saya dapat melipatgandakan pengeluaran iaitu membuat perencah nasi goreng dalam kuantiti yang banyak dan mudah untuk disimpan.

“Perniagaan nasi goreng atas jenama Nagoden ini diilhamkan bagi memudahkan rakan-rakan mahasiswa membuat tempa-

han,” katanya.

Bagi Muhammad **Amin Amizan**, 22, pula, dia menerima sebuah kamera DSLR bagi mengembangkan perniagaan perkhidmatan fotografi.

“Sebelum ini saya hanya menggunakan kamera terpakai. Dengan adanya geran SSM pastinya impian untuk mengembangkan perniagaan dapat direalisasikan,” kata penuntut tahun tiga Ijazah Sarjana Muda Pentadbiran Perniagaan (Pemasaran) itu.